

榆溪詩鈔
柿葉庵詩選



榆
溪
詩
鈔

徐世溥撰

中
華
書
局

叢書集成初編

榆溪詩鈔（及其他一種）

中華書局出版發行

（北京王府井大街三十六號）

秦皇島市資料印刷廠印刷

一九八五年北京新一版

開本：七八七乘一〇九二毫米三十二分之一

統一書號：一七〇一八·一五一

此據豫章叢書本
影印初編各叢書
僅有此本

余鄉侯朝宗與南州徐巨源皆以名家子擅文章之譽其才調同其風流倜儻終身不遇亦略相同獨巨源不得其死且子孫式微遺稿散失堪爲痛惜余來南州三載始訪得其孫於別邑爲之娶而卹其家從諸生朱子容重饒子炳搜其遺集之僅存者讀之文則自陳伯璣所刻榆溪集外寥寥無幾詩雖淘汰閒有未淨而取材博用意遠不規規於漢魏唐宋諸家而每窺其堂奧爰同兒至摘錄授梓附榆溪文集以傳庶與朝宗同不朽云顧朝宗之文海內無閒言獨詩不能無遺憾此集出

朝宗實有所不逮巨源亦可含笑於地下矣康熙辛未
冬十月商丘宋瑩書

榆溪詩鈔卷上

新建 徐世溥 巨源 撰

擬古

行行重行行今日新別離宿昔慕遠遊臨發步遲遲巢
鳥思雲翔臨飛戀舊枝在林忘天高出門知路遠瀕行
囑加餐使我不能飯從來不出閨送君忽踰限望望不
見塵車音下長坂

青青河畔草葳蕤夾道長君行經此道知君思故鄉君
思故鄉草我思園中葵採葵爲朝蔬思君遺寘之我自

傷心苦何必令君知

青青陵上柏長風振其柯巖谷響浩浩洪川起夕波人生百年內歡笑時幾何白髮尋朱顏倏忽相親摩但苦生年短日月非不多春夏秋冬春惟當日酒歌

今日良燕會知交坐一堂上下兩相對五五坐兩旁舒情極談笑小童行壺觴中筵半坐起有似花低昂瞻瞻日已夕繼以燈燭光文章視興會功業在富強且自極行樂無爲撓中腸

西北有高樓迢迢出半空美人處其上垂簾何玲瓏低

頭如有思乃在天之東天東赤日出光正射樓中舉頭
欲望之奈此光晶融相望尙難見何時得相逢援琴待
明月徙倚晝忡忡

明月皎夜光照此孤鳴琴彈爲別鶴操遠託飛鴻音中
曲怨零亂隨風聞四鄰鄰發來請觀惜問此何珍外黑
象幽室中空含素心七絃數雖單五音配成倫皎皎十
三徽眾星朗然陳願爲牛與女勿爲參與辰

冉冉孤生竹客言中樂材直節自上古伶倫昔所栽旣
蒙知音賞敢與君子乖洞簫與橫笛會唯君所裁當年

未結耦不爲鳳凰棲今幸霑拂拭素手日提攜所嗟捐
枝葉發聲每含悽

迴車駕言邁言之京與雒故人多通顯未知今厚薄鏡
顏有盛衰一身難自度何況他人心與我本殊膜遠遊
值佳辰興感倍消索君子不竭交且歸肆行樂

客從遠方來遺我萬言書欲獻區區忠君門萬里餘萬
里不云遠恐厭萬言長上書不竟讀何殊委道旁一言
倘見察甘之首山陽

詠懷

二儀列卑高一氣涵終古日月始生時人天可共語古
民烏知漁華胥初試罟在山誰始樵丁丁燧人斧大聖
日有作靈業被區宇八畫既已陳天缺安可補

大撓未作厯其民若椿蕢草木遞榮替天皇已萬齡甲
子編支幹人乃有死生當其溟滓時孰爲殤與彭烈山
咀藥後醫厲更相爭

標榜咎尉俊黨議謂由茲吾聞元凱目已在高辛時重
華去我久何由就敝辭獨斷舉良族黜幽就禦魑明穆
虞帝庭安得不垂衣

臨岐與妻約待我廿五年英雄握長算壽夭不問天杯
酒舒霸氣避含讓中原忽爲窮寇屈降服羸女前倚素
不恃楚剛柔各有權向非天成入無乃多失言

年往諒難少日映豈再中煦照衰周史挽世向鴻濛著
書未忘言用意良亦工答孔名已立遇尹術豈窮藏尾
始疑神留迹豈傷冲滅影流沙去所以稱猶龍

送劉士雲浙遊

昨夜秋風渡江曲黃葉相追下平陸荒垠沙激鷗鷀宿
游子愁見江水綠憑酒舟前悵不語輕風颯颯吹衣舉

詩卷衣囊誰重輕
舟頭橫截西山去
西山代我一送君
楓樹林中多白雲
桃花已過楓都赤
若向天台又問津
漑園訪萬茂先

名園遠在漑湖東
行到沙潭晚斷紅
策杖人投楓葉裏
敲門犬吠月林中
花閒引路燃杭穗
酒後巡欄犯草蟲
明日薔薇應滿院
宵分暫聽野烟籠

宿漑園早起

酒醒衾寒不憶家
五更清論徧生涯
風聲忽動前岡樹
雨氣勻催昨夜花
蜂競穿鬚環架鬧
燕輕翹尾蘸波斜

東西南北都垂柳織就簾紋亂綠加

別萬茂先還家

不移瓶硯與琴箋累日西牕事事便
暗葉香中斟別酒
明沙渡口過漁船
干林布穀唳紅雨
一路新苗起綠烟
歸去卻添惆悵意
燈花詩草記今年

牡丹詩

三月五日朱文邀集余因過鄧將軍談到遲同楊機部陳士業諸公分韻

淡雲搖處綺霞屯
香國樓臺影作邨
餘濕未勻朝浣面
春寒留護夕陽魂
筵張新月斜聯袂
燭帶三星迭舉樽
莫恨錦韉遲好夢
佳期自古待黃昏

小山亭

長兄構亭池中四面紫石名之曰小山亭落成屬賦

近結香茆值晚春
牕開面面石爲鄰
捲簾花入紅鶯座
掃地風來綠起塵
欹枕醉疑船上臥
小橋閑湊畫中身
吾兄詩境佳如許
何處池塘草不新

羣峰咫尺盡嵯峨
池上看亭遠似荷
欲雨依然雲觸石
微風也復水生波
蒹葭宛在秦人屋
桂樹看成楚調歌
莫話淮南雞犬事
至今招隱不如他

元水歲暮自豐城歸初欲之金壇及四日得扎知
改往金陵

去歲豐城雪後卮曾憐旅況不相宜纔看玉燭三行歷
悔作金沙萬里詞鷗鷺春聲隨地改魚龍夜色爲君遲
江南江北梅花曲吹徧雲天欲晡時

人日送陳元水之金陵

庚午

正是東風七日天草堂薄醉又經年

己巳人日與元水飲於草堂雪

分浦色初知岸晴破江寒未散烟鐵騎頻關孤驛夢金
陵好寄遠游篇蒼茫詩思斜陽裏無限離愁付短弦

送余小星遊浙

小星同上雲遊浙後芑孫兩日而發余時居湖上

何事南飈送客多經旬三度唱離歌輕帆已指蕪江路

雙槳還尋海瀝波野照鴉殘遙似葉湖天鳥下不勝荷
風扉自掩成孤坐涼月紛紛掛薜蘿

辛未春中重逢晏山人彈陽關操

一別麻源酒幾傾支離已見二毛生十年風雨陽關曲
今日重聞第四聲余年十四從山人學彈陽關操未竟
山人復遊建武至是始歸已十年矣
幾多哀怨在殘絲猶是當年樂府詞差比杜陵春恨淺
龜年更值落花時

攜晏山人過喻京孟花亭操平沙落鴈

湖上桃花花外楹客來無語坐湖亭似嫌乳燕多輕薄